



Na osnovu člana 22 Statuta Brčko distrikta BiH - prečišćeni tekst (Službeni glasnik Brčko distrikta BiH, broj 2/10) i člana 30 Poslovnika o radu Skupštine Brčko distrikta BiH - prečišćeni tekst (Službeni glasnik Brčko distrikta BiH, broj 54/18), Skupština Brčko distrikta BiH na 62. redovnoj sjednici održanoj 29. aprila 2020. godine, donosi

## **IZMJENE I DOPUNE POSLOVNIKA O RADU SKUPŠTINE BRČKO DISTRIKTA BOSNE I HERCEGOVINE**

### Član 1

U Poslovniku o radu Skupštine Brčko distrikta BiH – prečišćeni tekst (Službeni glasnik Brčko distrikta BiH, broj 54/18), iza člana 76 dodaje se novi član 76a koji glasi:

#### Član 76a

(Zakazivanje i održavanje sjednica u vrijeme proglašenog stanja prirodne i druge nesreće ili drugog vanrednog stanja)

- (1) Za vrijeme proglašenog stanja prirodne i druge nesreće ili drugog vanrednog stanja, sjednice Skupštine i komisija se mogu održavati online korištenjem informatičkog sistema koji podržava prijenos videokonferencija ili aplikacija, programa i drugih elektronskih platformi za direktnu glasovnu i videokonferenciju.
- (2) Na sjednicama iz stava 1 ovog člana, Skupština i komisije će raspravljati i odlučivati u okviru svojih nadležnosti koje su neophodne za funkcionisanje Brčko distrikta BiH u uslovima proglašenog stanja prirodne i druge nesreće ili drugog vanrednog stanja, ili onih čija je neodloživost definisana Statutom, zakonima ili ugovornim obavezama Brčko distrikta BiH.
- (3) Prilikom održavanja sjednica iz stava 1 ovog člana shodno se primjenjuju odredbe ovog poslovnika i osiguravaju potrebne tehničke pretpostavke za rad i odlučivanje.
- (4) Izuzetno, od člana 5 stava 2 ovog poslovnika za vrijeme proglašenog stanja prirodne i druge nesreće ili drugog vanrednog stanja, sjednice Skupštine će se održavati po potrebi.

### Član 2

U članu 77 stav 2 mijenja se i glasi:

(2) Kvorum se utvrđuje prebrojavanjem prisutnog broja poslanika ili upotrebom elektronskog sistema za glasanje, na taj način što je svaki poslanik dužan da se identifikuje ubacivanjem elektronske identifikacione kartice u jedinicu elektronskog sistema poslaničkog mjesta u sali.“

### Član 3

Član 100 mijenja se i glasi:

#### Član 100

(Način glasanja)

- (1) Glasanje u Skupštini je javno, dizanjem ruku ili kartice za glasanje ili putem elektronskog sistema za glasanje.

- (2) Glasanje dizanjem ruku ili kartice za glasanje vrši se samo ako elektronski sistem za glasanje nije u funkciji ili ako Skupština o tome prethodno odluči.
- (3) Prije glasanja predsjednik Skupštine utvrđuje i saopštava vrijeme glasanja upotrebom elektronskog sistema, s tim da vrijeme za glasanje ne može biti kraće od 10 sekundi niti duže od 30 sekundi.
- (4) Predsjednik Skupštine, preko Stručne službe, obezbjeđuje brojanje glasova i izvještaj o glasanju odnosno računarski izvod glasanja u elektronskom sistemu glasanja.
- (5) Poslanici glasaju “za” i “protiv” prijedloga ili su “suzdržani”.
- (6) Potrebna većina glasova se utvrđuje u odnosu na ukupan broj poslanika koji su glasali, u smislu stava 5 ovog člana.
- (7) Prilikom donošenja odluka iz člana 33a stava 1 Statuta Distrikta, suzdržani glasovi se ubrajaju pri utvrđivanju kvoruma, ali se ne ubrajaju pri utvrđivanju potrebne većine niti se ubrajaju u ukupan broj glasova poslanika koji su glasali, tako da se potrebna većina utvrđuje samo u odnosu na broj glasova onih koji su glasali “za” i “protiv”.
- (8) Nakon glasanja predsjednik Skupštine utvrđuje rezultate glasanja.
- (9) Na osnovu ovih rezultata predsjednik Skupštine objavljuje da li je prijedlog prihvaćen ili odbijen.
- (10) Ukoliko neko od poslanika izrazi sumnju u utvrđene rezultate glasanja, predsjednik Skupštine provodi pojedinačno glasanje prozivanjem svakog poslanika po imenu i prezimenu, o čemu se vodi poseban zapisnik.
- (11) Nakon provedenog pojedinačnog glasanja, predsjednik Skupštine utvrđuje i objavljuje rezultate glasanja.
- (12) Zapisnik o rezultatima pojedinačnog glasanja se odlaže u arhivu Skupštine.

#### Član 4

Iza člana 100 dodaje se novi član 100a koji glasi:

#### Član 100a

- (1) Poslanici su dužni da koriste isključivo svoje identifikacione kartice, kao i da se identifikuju pri ulasku u salu ubacivanjem kartice u poslaničku jedinicu, odnosno da se odjave prilikom napuštanja sale.
- (2) Predsjednik Skupštine će upozoriti poslanika koji koristi identifikacionu karticu drugog poslanika, odnosno na drugi način zloupotrebljava elektronski sistem za glasanje, a glasanje u kojem je zloupotreba izvršena bit će poništeno i odmah će se pristupiti identifikaciji i ponovnom glasanju.
- (3) Poslanik koji i pored upozorenja iz stava 2 ovog člana i dalje ometa rad Skupštine bit će isključen sa sjednice čiji rad ometa i obavezan je da napusti sjednicu i da ne učestvuje u daljnjem radu te sjednice.
- (4) Poslanici, pri izlasku iz sale Skupštine, dužni su da identifikacione kartice izvade iz poslaničke jedinice.
- (5) Poslanik je dužan da nestanak svoje identifikacione kartice odmah prijavi Stručnoj službi Skupštine.

#### Član 5

Ove izmjene i dopune poslovnika stupaju na snagu danom donošenja i objavit će se u Službenom glasniku Brčko distrikta BiH.

Broj: 01-02-858/20

Brčko, 29. 4. 2020. godine

PREDSJEDNIK  
SKUPŠTINE BRČKO DISTRIKTA BiH  
**Esed Kadrić**